


ديوان غناوي العشق

للشاعر / خالد عبد المعطي



حقوق الطبع والنشر محفوظة

لدار الأديب للنشر والتوزيع



دار الأديب للنشر والتوزيع

اسم الدار

غناوي العشق

اسم الديوان

خالد عبد المعطي

اسم الشاعر

(٢٠١٨/٢١٥٤٦) بدار الكتب المصرية

رقم الإيداع

دار الأديب للنشر والتوزيع

الإخراج الصحفي

من تصميمات الدار.

الغلاف

الأهداء

قدما في الكثير في حياتهما
ومازالا يقدران في الكثير و الكثير حتى بعد الرحيل
فلهما اهري عملى هذا
أسى .. و.. أبى

خالد ...

المقدمة

عندما تأخذنا الكلمات الي سماعات الإبداع لا بد أن نذكر قلائل من الشعراء المعاصرين اللذين اتحفونا بجميل أشعارهم الخالدة.

ونحن نقف هنا علي ناصية روائع الكلم وإبداعات حفرت في الوجدان وأثرت في الأبدان من معسول الكلم فعندما تجولنا بين دفتي ديوان (غناوي العشق) للشاعر خالد عبد المعطي وجدناه شاعراً حلق بنا إلي منتهي أفق الكلمة العزبة وصوره المعبرة عن الحالة الشعورية والشاعرية.

تلاعب الشاعر بالألفاظ والكلمات وكون منها بديع الصور الجمالية فخجرت من بين يديه قصائد رائعة كتبت بمدادٍ ينزف بالموهبة ويراع يسيل علي أوراق نقشت عليها روائع القصائد التي كتبت بالسهل الممتع.

تميز الشاعر بعميته المنمقة التي لم تخرج عن إطار العامية المصرية هذه اللهجة التي تؤثر فينا القلوب كونها لهجتنا المعتر بها ومن أشعاره التي توقفنا عندها قصيدة:

(بعد هواكي)

مش بتهرب أبدا منك

لكن عايز ابعـد عنك..

قلبي الطيب كنت مناه

كنت الحلم اللي اتمناه..

ياما بعدتي عنه ايام

فاتت عندي شهور وسنين..

قلبي في ليل الشوق ماينام

ودموع عيني جراح وانين..

جايه بتسألني ليه دلوقتي

وبعد ماكنتي عذابي في دنيتي وحيرتي...!!

في سينفونية عزف الشاعر علي كثارة الكلمات لينسج من وحي شاعريته أعزب الألحان ليشنف بها آذان القارئ، طغي الجرس الموسيقي علي الكلمات ليكون بكلماته معزوفة رائعة مزج فيها ما بين العبارة والموسيقى (مش بتهرب أبداً منك) حركة داخلية رُسمت بالكلمات (كنت الحلم اللي اتناه) سکون في الحلم الذي كان يتمناه ليري المعشوقة في أحلامه الوردية، علاقه ما بين الحركة والسكون لكأن الشاعر يريد أن يقدم العروض الشعر بموسيقى الحركة والسكون في قصيدته ليصتعيض عن موسيقى الشعر العربي بهذه التفعيلة من الكلمات فغلب علي قصائده الجرس الموسيقي وهذا ما رأيناه في مجمل قصائد الديوان.

إن للشاعر حس متفرد قلما نجده عند شعراء العامية المصرية، فقد جرت الكلمات علي لسانه كما يجري الدم في العروق ونستدل بذلك من خلال قصيدة :

(خلاص ماشية)

و هو انتي مش قولتي .. خلاص ماشيه ..

و فايته حياتي و زمانى ..

و لملمتى حنين قلبك

و شوق كان لسه بيغالبك .. !!

ونختم بكلمات الشاعر (خالد عبد المعطي) ونقول ان انشغاله (بميتافيزيقا) الحركة التي نراها في مفرداته التالية: (خلاص ماشيه - وفايته - ولملمتى) صناعة الكلمات هي حرفة اجادها الشاعر بمهارة متقنة .. فنقش بها على جدران القلب .. والاحساس .. دام للإبداع فيض قلمه ومداد كلماته.

بقلم د. سيد غيث ..

أنا شاعر

. مالهيش ديوان..

...

. رسام عنيه عمرها
. ما ع رفت الالوان..

...

. بحار و عمرى كله
. في الجبل عايش..

...

. صبي حكيم قلبى
. وعقلي شيخ طائش..

...

. لعيب ولكن مانيش حريف
. لكن دايمما بجيب اجوان..

...

. انا ابن ادم اللي
. خد من قابيل ندمه..

...

. ومن هابيل رحمته
. ما زلت في يوم قدمه..
. وم الغراب حكته

وياس الكون ما يوم هدمه..

...

كائن ضعيف جبار

وصفوه في كتب السحر والاسرار

قالوا ده الانسان ..



قلبك لقيط

(القلب تحت حمل الحزن نخ)

لكن الجسد واقف عنيد..

...

والليل بيتحدي النهار

وناصبله فخ

لكن الامل عمال يزيد..

...

والعمر عدا و في الوجوه

بص وصرخ

الزمن هز الكتاف

قال ايه يفيد..

...

قلبك عبيط

لو هو بحر من المحبه

البعد اكبر م المحيط..

...

ابن مين علشان تحب

مش راح تطول مهما تشب

انا موجي عالي

وحتي بحري عليك غويط..

...

حتي الهوي بقي بالنسب

وفي امتحان العشق عندك

قلبي رسب..

واما سألت عن السبب

ردت عنيك قلبك لقيط..

...

مطلوب في اوراق الهوي

كشفت هيئه وكشفت عيله..

...

وكمان ملخص عن حياتك

وكل يوم عشت فيه

وكل ليله..

...

مطلوب تستوفي الورق

وقدام عنيك لسته طويله..

...

عن اللي فاتك

وذكرياتك

قصة حياتك

ومعني ذاتك

.....الخ...الخ.....

وتمضي وتبصم بكل ايد..

...

القلب تحت حمل الحزن نخ

لكن الجسد واقف عنيد..

وانت مغمضه

(جميله قوي ابتسامتك وانت مغمضة)

.وما تسألينش

.ازاي بشوفك..

...

.انا روجي فيكي هايمه

.وطايره في الفضاء

.متغلغله حتي في حروفك..

...

.عند السكات ببقى السكات

.وفي الكلام ببقى الصدا..

...

.انا قوتك عند التحدي

.و رعتك لو يجي خوفك..

...

.أنا النصيب وانا القضا

.وانا الغرام م المبتدا

.وانا الخطوط اللي في كفوفك..



أكبر وهم

(كان اكبر وهم فى حياتى)

انى جعلتك حياتى..

...

انى شوفتك دنيتى

و حلم عمرى و ذكرياتى..

...

انى غنيتك فى همسى

و شوفت فيكى ضلى و شمسى

و غنوتك سكنت سكاتى..

...

يمكن اكون كنت واهم

و لا قلبى ماكانش فاهم

بس غلطة عمرى انى

عشت ليكى بامنياتى..

...

ياللى حبك عاش فى قلبى

الف ليله

كل ليله بألف ليله

و كل كلمه بألف سهره..

...

ياللى حبيتك فى فرحى

ياللى حبيتك فى جرحى
و فى الامى و فى اهاتى..

...

كان اكبر وهم انى جعلتك
دنيتى و عمرى و حياتى..

...

قلبي كان فى حبك انت
طير صغير
شافك انت عشه و سماه
و حلم عمره اللى التقاه
طار عليكى بريشه الاخضر
قبل ما يكبر جناحه..

...

شاف عنيكى دنيا تانيه
ينسى فيها حزنه و جراحه..

...

عمره ما كان يفكر
ان عيونك تعرف تخون..

...

ان الامان و الحب
و القلب الحنون..

...

كل ده فى لحظه واحده

يصبح سراب يصبح جنون..

...

و ان دوامة نهايتي
بتتخلق من طوق نجاتي..

...

ياللى ذنب عمرى انى
جعلت حبك دنيتي
و عمرى و حياتي..

...

يا حلم عمرى و منتهاه..

...

يا اكبر وهم عشت فيه
و قصر رمل قلبى بناه..

...

ياللى حبك كنت فاكره
بحور امانى و طوق نجاه..

...

انهارده سبت قلبى معاكى
و لوحدى مسافر..

...

غصب عنى بسيبه عندك
قلبى كل هواه فى عندك
و فى خداعك و ف جنونك..

جايز زى ما خنتى حبى
فى يوم اخونك..
بس غلطة عمرى ان قلبى
طبعه يصونك..

...
و انى جعلتك دنيتى
و عمرى و حياتى
و هويت جنونك..



الهوى مبقاش طريقنا

(الهوى مبقاش طريقنا)

و الفرح شمعہ مفارقنا..

..

و الدموع صاحبة عنيا

لما غبتى و افترقنا..

..

كنت بقول الدنيا باعتنى

و انت لوحدك اشترتيني..

..

اتارى الدنيا طبعها طبعك

هى تبيع و انت تخونيني..

..

بالخداع تحت البراءه

و الفراق باسم الصداقه..

..

و الهوى اللى كان ما بينا

ضاع فى ثانيه و افترقنا..

..

ده الهوى مبقاش طريقنا

و الفرح شمعہ مفارقنا..

..

و الدموع صاحبة عنيا

لما غبتى و افترقنا..

كنت بشوف الشمس بتغرب
بس بتشرق جوه عنيكى
شمس جديده..

..
كنت باعيش فى الجنة فى قربك
و ف نار شوقى و انت بعيده..

..
كنت بغنى و انا وياكى
و اهو دلوقتى
الغنا تنهيده..

..
فى اللقا الخوف كان سابقنا
و الوداع مليون جراه..

..
و انكتب اخر طريقنا
نفترق باسم الصداقه..

..
و الهوى اللى كان ما بينا
ضاع فى ثانيه و افترقنا..

..
ده الهوى مبقاش طريقنا
والفرح شمعاه مفارقنا..

..
والدموع صاحبة عنيا
لما غبتى و افترقنا..

اعذرينى
لما اقول انى نسيته
بس او عى تصدقيني..

..
اعذرينى
مش بايدى انى هويتك
او بايدى
يجي يوم و تودعيني..

..
اعذرينى
قد حلمى و شوقى ليكى
كنت انت بتخدعيني..

..
القلب كان مشتاق لحبك
و العيون كانت مشتاقه..

..
وانهارده يغيب و يبعد
حبنا فى توب الصداقه..

و الهوى اللى كان ما بينا
ضاع فى ثانيه و افترقنا..

ما الهوى مبقاش طريقنا
والفرح شمعاه مفارقنا..

والدموع صاحبة عنيا
لما غبتي و افترقنا..

بعد هواكى

مش بتهرب ابدأ منك
لكن عايز ابعده عنك..

...

قلبي الطيب كنت مناه
كنت الحلم اللي اتمناه..

...

ياما بعدتي عنه ايام
فاتت عندي شهور وسنين..

...

قلبي في ليل الشوق ماينام
ودموع عيني جراح وانين..

...

جايه بتسألني ليه دلوقتي
بعد ماكنتي عذابي وحيرتي..

...

فكرك قلبي يحن اليك
لا مش ممكن
ولا عيوني تلاغي عنكي
لا مش ممكن..

...

بعد ما قلبي جرحتيه
بعد العقل ما حيرتيه
ليه دلوقتي بتسألني ليه..

فكرك هنسي الغدر واصالح
ولا القلب عاد بيسامح
لا مش ممكن..

...
حبك سهم وصاب القلب
لكن قلبك كان جارح..

...
خلا القلب ما عاد فيه حب
خلي الحب لقلب امبارح..

...
قلب امبارح ضاع من ايدي
كنت حبيبتي وضيعتية..

...
ضاع بالحب وفرحي وعيدي
بعد ما قلتي وجرحتية..

...
قلتي كلام قاسي وجراح
خلا القلب دموع وجراح..

...
يومها القلب ضاع في الدنيا
حتي البسمه خدها وراح..

...
انا مش ليك ولا انت حبيبي
واحد تاني هو حبيبي..

يومها الدنيا ضاعت مني..

...

عمر بحاله عشت هواكي
عشت بأمر هواكي اغني..

...

وانت بكلمه بس بكلمه ضيعتيني
وضاع الحب وضاع القلب
حتي الدنيا ضلعت مني..

...

ماشي ف شارع حزن طويل..

...

زي هواكي ما كان في عنيه
بسمه وفرحه وحلم جميل..

...

بعد شويه لقيت الدنيا
قسوه وجرح ودمع الليل..

...

حتي الشارع غضبان مني..

...

اقرب منه يبعد عني
زي هواكي..

...

حتي الليل ساكت ما اتكلم
بعد ما كان في هواكي صديقي..
كنا بنسهر وبنتكلم

وبنرسم في هواكي طريقي..

...

بعد ما سابنا هواكي وسافر.
ياللي هواكي كان موج غادر..

...

حتي الليل اسهر وياه.
اضحك وابكي واقول وياه..

...

حتي بكلمه ما رد عليا.
خايف اقوله يرد عليا.
يقولي الكلمه اللي قولتيها..

...

انا مش ليك ولا انت حبيبي.
واحد تاني هو حبيبي..

...

سبت الليل وسهرت لوحدي.
مع احزاني و حيرتي وسهدي..

...

عشت الليل مع حزني والمي.
انا الحزن و ورقي وقلمي..

...

ورقي يبص بحزن عليا.
قلمي يبكي بحزن عليا..

...

حتي بكاه كان كلمات

تطلع منه تعذب فيا..

...

نفس كلامه هو كلامك..

...

بعد ما كان بيطاوع عقلي
يكتب زي ما عقلي يقوله..

...

بقي دلوقتي يطاوعك انت
ينقل عنك كلامك كله..

...

نفس الكلمه اللي قولتها
بيردها بعد انت ما رددتها..

...

انا مش ليك ولا انت حبيبي
واحد تاني هو حبيبي..

...

واحد تاني؟؟؟؟
اعرف مين..

...

وعاش من عمره احلي سنين..

...

يحلم بيكي بساعه قربك
يوهب كل حياته لحبك..
زي ما قلبي عاش في هواي
احلي سنين واحلي ايام..

...
يرسم كلمه حب يقولها لقلبك
مره في نظره او حتي سلام..

...
يرسم احلي ايامه معاكي
ويعيش فيها ولو احلام..

...
بس ايامه معاكي راحت
اتاري الحلم ده كان او هام..

...
بعد الكلمه اللي قلبي رسمها
ما طلعت عكس ما قلتي تمام..

...
كنت اتمني تقولي بحبك
او اقراها يوم في عيونك..

...
قلبي ياما لطيفك قالها
وحلف ما يوم في عمره يخونك..

...
لكن انت ضيعتيني
وضاع الحب وضاع العمر
حتي القلب ضاع بجنونك..
بعد ما قلتي الكلمه القاسيه
فاكره الكلمه؟؟ ولا نسيتي؟؟..

...

او عي تكوني جايه وناسيه
يوم ما جرحتي قلبي وقسيتي..

...

يوم ما قلت مش انت حبيبي
واحد تاني هو حبيبي..

...

اقدر اعرف بتسألني ليه؟؟..

...

لا انا الحب ولا انا القلب
اللي انت في يوم واحد راعيته..

...

فكرك قلبي يسامح قلبك؟
قلبي ضاع من يوم ما سافرتي..

...

ومش هيعود لو عاد حبك
قلبي نسيكي يوم ما غدرتني..

...

حتي ان موج بحرك كان هادي
بعد ما يغرق قلبي لا يمكن
تاني يعود..

نفس الكلمه لسه قصادي
مش هتروح بكلام و وعود..

...

انا مش ليكي ولا انت حبيبتني

و لا غيرك راح يعرف قلبي..

...

بعد هواكي القلب ما يهوي
حتي هواكى راح انساه..

...

بعد ما كنت حلم في عيني
عشت حياتي اجري وراه..

...

كنت حياتي وكنت سفينتي
وقلبي رماه الموج غرقان..

...

بعد هواكي لا هيهواكي
ولا هيهوي الحب كمان..

...

بعد هواكي راح انساكي
بعد هواكي هكون انسان..

...

لا يعرف الحب ولايخدعه قلب
ولا حتي فرشله الارض حنان..



انت ايه..؟؟

.انت ايه
.و مين و ليه؟
.يسألنى قلبى و اجاوب
.ما عندى علم..

..
يمكن حقيقه و ربما
مشهد خيالى بلمحه
فى كل فيلم..

..
و اما بنام بدعى ربى
نومى يطول..

..
و ارمى السؤال جوه قلبى
القاء يقول..

..
خايف انام تغيبى عنى
خايف افوق
تكونى حلم..



تقدرى..؟؟

لو بتقولى بتحبينى اكثر منى
اقولك لاء

.عيونك فاتحه للاشواق
فى قلبى هويس..

...

.و لو قولتى العيون عاشقه
و قلبك دق

.انا راسمك عروسه نيلى
و بسهرلك نهارى و ليلى
يا احلى هاميس..

...

.هتتحدينى؟؟ هتتحداكى
هاتى عيونك لو تقدر
و يالا نقيس..

...

.انا ممكن
اسرح عمرى فى عيونك
تقدرى..

...

.انا ممكن
ابيع العقل و اتوه العمر فى جنونك
تقدرى..

انا ممكن
افوت الكون و يكفينى حدود كونك
تقدرى..

...

ردى عليا تقدرى؟؟
و بلاش كثير تفكرى..

...

انا حبك بيجرى
ويا انفاسى..

...

انا حبك ساكن
قلبى و احساسى..

...

انا حبك
كثير بقساوه يجرحنى
و هو برضوا بيواسى..

...

اقولك ايه؟؟

...

ما انا مهما اقول عنك
اكيد عندى كلام اكثر
لكن عقلى اكيد ناسى..



خلاص ماشيه؟

و هو انت مش قولتى
خلاص ماشيه
و فايته حياتى و زمانى..

...

و لملتى حنين قلبك
و شوق كان لسه بيغالبك
و قولتى مش هعود تانى..

...

و رديتى ع الدموع بابك
و لا سمعتى لصوت قلبى
اللى فى طرف هواكى كان شابك
و قولتى لفرحى ينسانى..

...

و هو مش انت الللى بعنى
للعذاب حلمى..

...

و هديتى قصورى و كان علمى
هواكى ليا كان بانى..

...

طب ليه قوليلى دلوقتى
بشوفك ليه بطول وقتى
و ساكنه كل اركانى..
و ليه طيفك بيندهلى
و صوتك لسه فايتهلى

يهز كل وجدانى..

...

و ليه رغم البعاد شايك
و اسمى لسه فى شفايك
فى ودنى احلى الحانى..

...

و ليه عيونى بتدمع
و صوتك فى الفضا مسمع
و ليه ساكنه فى شريانى..

...

بنات افكارى ليه شايه
ملاحك كلها فيها..

...

و دمعة عينى ليه سايله
و عينى النوم مجافيا..

...

و شجرة حبنا المايه
خريفها ليه وصل بدرى
و بلون الحزن كاسيها..
نسيتى حلمنا سهيله
طب مين بعدك يسميها..



و مين هيردد الالخان
و يلعب ويا سفيان
و يستتاني في اهدى ركن م الاركان
يا كل الدنيا و ما فيها..



كنت بحسب

انا كنت بحسب

لما همشى هتعرفى

انا ماشى ليه..

...

و هتعرفى ان الحنين اللي اتجمع

فى البعد راسم بحر امواجه وجع

و انا دوبت فيه..

...

و انى طارح فى البحور كل الشبك

لاجل ما جمع لؤلؤ الشوق من عيونك

لما اشوف شوقها ارتبك

و اقسام الأشعار عليه..

...

و ساعتها شعرى هيعترف

انا كنت فىن

...

و العيون هتبوح بسرى

فى نظرتين..

...

و هتتعترف

انى قاصد م الغياب عن سكتك

قلبي يفرح لما يلمح لهفتك

و انت بتقولى

كنت فىن؟؟

ألف وش

كله غش

كله لابس فوق ملامحه

الف وش

بس قلبي الله يسامحه

ليه معايا ماتفاهمش؟..

...

لو كان سألني

كنت جاوبت عليه اكيد..

...

واشيل الحمل عنه وعني

وانصحه يفضل بعيد..

...

طب ليه يا قلبي خلفت ظني

وليه معايا تكون عنيد؟..

...

حببت يا صاحبي؟

جاوبني ياالله..

...

اللي قلوبهم يعلم الله

خدعوك بمظهر اش اش..

...

لعبه ومعاك ابتدوها

وفي اخرها

قالوا كش..

مات الملك
قصدي اللي كان زمان ملك
ماينكسرش..

...

خلاص انكسر
وصبح ضحيه..

...

وانضم لصفوف الرعيه
مبقاش طاووس
عصفور جريح
استكثروا بيقاله عش..

...

كله عش
كله لابس فوق ملامحه
الف وش..



احلى حب

أحلى حب

كان زماااان..

...

كان يدق القلب دقه

تقولشي نغمه جايه من اوتار كمان..

...

والعيون كانت بتلمع

لما تمر عليك حبيبتك

ولا لخبطة الكيان..

...

يااااه

احلي حب كان زمان

فاكرة يا بنت الجيران؟..

...

طب فاكرة لما كنت

بعمل بذاكر بالساعات..

...

والكتاب علي صفحه واحده

ومعلي اغنية نجاة..

...

وانتظاري معاد نزولك

للدروس وكان حد وتلات..

...

يااااه لما كنت المح عيونك

وابتسامتك اللي كانوا
شمعة العمر اللي فات..

...

وافترقنا
والزمن عدا وسرقنا
وليل بعاد مالهوش اخر..

...

وكل ما نحلم يجمعنا اللقا
بيضحك علينا القدر
ابو قلب ساخر..

...

يمكن اكون وسط الزحام مره نسيتهك
بس قلبي اللي في بعادك انجرح
طول عمره فاكر..



مسافره وحدك

مسافره وحدك ؟

و لا واخده معاى

قلبي؟..

...

الى غلبتیه مناهده

لما مال ليكى

و مالبى..

...

ع القسا خليكى شاهده

قلبي بيدعى عليكى

ربى..

...

تلقى نفسك مره واحده

مجنونه عشق

و اضحك و اقول

يا حلوه ذنبى..

هو مات...؟؟

هو مات؟

.ايوه مات.

.بس دفنوه من سكات..

...

.والعزا كان جوا قلبي.

.يوم وداعك اللي فات..

...

.ناس كثير غابوا وماجوش.

.كل احاسيسهم فاشوش..

...

.رسموا دهشه ع الوشوش.

.واتصعبوا ع الزكريات..

...

.كانوا دايمما بيشوفونا.

.واحنا ويا بعضنا..

...

.كانوا دايمما يسألونا.

.لو يطول يوم بعدنا..

...

.كان نفسهم يبقوا.

.عشاق زينا..

...

.او يعيشوا حب زي حبنا.

.اللي مات..

وانت لسه بتسألني
هو مات؟..

...
ايوه مات.
بس دفنوه من سكات..

...
والعزا كان جوه قلبي
يوم وداعك اللي فات..



ستایر خوف

و لیه عاوزانی اتکتف
بأشواقی..

...

و لیه عاوزه السکات دایما
یکون دائی..

...

و لیه لو جانی الهوی اهرب
و اکون عطشان
و اخاف اشرب..

...

غریبه انت انما الاغرب
معاکی تهمتی وفائی..

...

...

ستایر خوف ما بین قلبی
و بین قلبك
بكل قساوه رامیها..

...

و بقلبی بشوف خیال قلبك
بشوقه و هو متخبی
و اشوف دنیتی وراها..

انا الملهوف
و شوقى نار كما البركان..
لا يعرف خوف
و لا يحوشوا لا ناس
و لا جان..

...
و جوايا اهات ليكى
تغنى و لحنها عنيكى..

...
بعمرى كله افديكى
و حتى العمر شويه كمان..



كاتب كرهتك

كاتب كرهتك بالرصاص

علشان احبك و امسحوا..

..

و انده بصوت مجروح يا ناس

ردولى قلبى فى مطرحوا..

..

ماعدش بعدك فى الوجود

غنيت فى بعدك الف عود..

..

و كل يوم بيقت سنه

يبكى قلبى و يجرحه..

..

و اللى انجرح مش قلبى انا

ده كل قلب فى مطرحوه..

..

كاتب كرهتك بالرصاص

علشان احبك و امسحوا..

..

و انده بصوت مجروح يا ناس

ردولى قلبى فى مطرحوا..

..

..

ايه راح يفيد لو تندمى تتألمى

او حتى يوم تتأسفى..

حتى المكان اللى اتقابلنا ياما فيه
بدأت معالمه تختفى..

..
الشمس خباها السحاب
و النور بيغرق فى الضباب..

..
و البعد قافل الف باب
و الف شمعه بتتطفى..

..
و قلبى مكتوب له العذاب
و عذابى قلبك فرحوا..

..
كاتب كرهتك بالرصاص
علشان احبك و امسحوا..

..
و انده بصوت مجروح يا ناس
ردولى قلبى فى مطرحوا..

..
..
البحر غاب عنه الامان
و موجه كان هادى و غدر..

..
طب ليه بنعتب ع اللى خان
و قلوبنا خاينها القدر..

مش بشتكى غدر الزمان
و لا طول غيابك و السفر..

..
انا بس بندم
ع اللي كان..

..
و ازاي عيونك علموني
في الدنيا دي طعم الامان..
و ازاي يخونوا و يجرحوا..

..
كاتب كرهتك بالرصاص
علشان احبك و امسحوا..

..
و انده بصوت مجروح يا ناس
ردولي قلبي في مطرحوا..



قلبك غبي

مش ملاحظه

ان قرار البعد عندك
اسهل كثير من انك في مره تقربي..

...

ولو في لحظه
الحنين حاول يعاندك
بتخبي قلبك جوه توب العقل وتهربي..

...

استني لحظه
القلوب ليها لغه صعب
تفهمها العقول..

...

والقلب اللي عاش في صمت
لأبد العقل يسمعه
لما ينطق او يقول..

...

العمر كام؟
العمر عام
هيبقي ايه لو نضيع في العناد
كل الفصول..

...

اسمحي لي عقلك اذكي

عقل يمكن
بس قلبك ليه غبي..

...
مش ملاحظه
ان قرار البعد عندك
اسهل كثير من انك في مره تقربي..



الله عليه الزعل

الله عليه الزعل

لما الرضا يصاحبه..

.....

ويغرق في بحر الامل

وموج الحنين ساحبه..

.....

وفي دوامات الشوق

تحذف عيونه الطوق..

.....

يصحي الفؤاد و يفوق

والعند وظن السوء

نلقي الهوي طاح به..



زى مين...؟؟

زى مين...

قوليلي انت زى مين..

...

ياللي قلبك

غير قلوب العاشقين..

...

نمشي الطريق وقلوبنا

فيه متجمعه

نفس الطريق نرجعه متفرقين..

...

ليه عيونك في الطريق

قابلت عيوني..

...

ياللي حبيتك بعقلي وبعيوني..

...

ليه كلامك عاش في قلبي

وغنوتك سكنت سكوني..

...

ليه قابلتك ليه وعدتي

ليه عشقتك ليه تخوني..

...

فين كلامك فين عهدك

وانت فين..

...

ياللي قلبك
غير قلوب العاشقين..

...

زي مين
في الحب انت..

...

ياللي حبك اتولد
في يوم ما خنتي..

...

ياريت يا قلبي كنت قاسي
ياريتك انت في يوم ما كنتي..

...

ليه يا صدفه بتجمعينا
وتلعبى باوتار قلوبنا..

...

وترجعى وتفرقينا
وترسمى سكة عذابنا..

...

هو ده المكتوب علينا
حزننا وحيرة شبابنا..

...

ولا يا صدفه كتير علينا
ان الامل يدق بابنا..

...

ليه الصدفه اختارتنا

واحننا في وسط المفارق..

...

نفس اليوم اللي فيه بنعشق
هو برضوا فيه نفارق..

...

مش كتير في لحظة واحده
تفرح عيوننا
وف دموعنا القلب غارق..

...

رجعيها يا صدفه تاني
رجعيها..

...

مش كفايه عمر وانت
بتخد عيني وتخد عيها..

...

واما القلوب اتجمعت
ليه في لحظة
ترجعي وتفرقيها..

...

عايز اقرب منها اكثر
واروي قلبي بنور عنيها..

...

عايز اجره مره فرحه
بس نفسي تكملها..

مش كفايه انى اشوفها
ونفترق تالني في ثوانى..

...

مش كفايه عايز احب
وفي عيونها اعرف مكانى..

...

جمعينا يا صدفه صدفه
حلقى لينا الامانى..



عيونك مجرمه

انا كنت فاكرك حلم

.وانت حقيقه

.وكل الحقايق مؤلمه..

...

.والظن لو كان علم

.وله طريقه

.اتعلمه يا دنيا الظنون الاثمه..

...

.نفس النهايه لكل فيلم

.القلب كان فاكرك بريئه

.طلعت عيونك مجرمه..



عيني يا حب

عيني يا حب في عينك

واحلف

انك مش متوصى عليا..

...

وان حبيبي لما بيوعد

ويرجع يخلف

صدفه وبعده مش في النيه..

...

اصل انا عارفك

ياما جرحت قلوب وداويت..

...

شهد شفايفك

في لحظة بيبقي دموع وياريت..

...

ما كنت عرفتك

ولا يوم اتجنيت وهويت

يا مكحل بالسهد عنيا..

...

عيني يا حب في عينك

واحلف

انك مش متوصى عليا..

...

كنت في حالي

وبيني وبينك بحور وبحور..

...

مرتاح بالى
وقلبي انا خالى
جوه براح الكون عصفور..

...

يوم ما بيعشق يعشق غنوه
يغنيها للهوى والنور..

...

ولا ليل يسهر
ولا يبني م الرمل قصور..

...

ما كنش فاهمك
واما رميتني اهو صاب سهمك
جناح القلب صبح مكسور
واهي لعبت اشواقك بيا..

...

عيني يا حب فى عينك
واحلف
انك مش متوصى عليا..

...

قاسى يا حب علينا
وحتى
اللى هويته زيك قاسى..
بحرك على ولا ليه مينا
وقلب حبيبي

ما فيهشى مراسى..

...

لياك طال طول ليالينا

والموال

مبقاش بيواسى..

...

ياريتنا ما روحنا معاه ولا جينا

رمانا بحبه وصبح ناسى

بعد ما صار الهوى والميه..

...

عيني يا حب في عينك

واحلف

انك مش متوصى عليا..

...

وان حبيبي لما بيوعد

ويرجع يخلف

صدفه وبعده مش في النيه..



كلمة الاعجاب

بسيطة كلمة الاعجاب
لكن شايله جواها
معانى كثير..

...

اميرة الحرف و الحرف
عن وصفك
واقف مصلوب و متكتف
و ليكى اسير..

...

تلف الكلمه و تدور
و تتلجج و تنهور
ما تلقى وصف يكفيكى
يا ملكه جايه م الاساطير..



الهوى مش مكتوبلنا

شكلنا الهوى مش مكتوب لنا
بياخدنا كتير كده علي عقلنا..

...

بيعلق روحنا بخيوطه
وبيضحك منا في سكوته..

...

وتوه ارواحنا في ملكوته
وتضيع وياه ايام عمرنا..

...

شكلنا والفرحه متخاصمين
عن بعض نقضي سنين تايهين..

...

ولو مره نتقابل صدفه
تستغرب اوي وتسال مين؟..

...

شكلنا هنعيش كده في الاوهام
وكفايه علينا بس الاحلام..

...

العمر بيجري ايام في ايام
والحلم كمان مبقاش حقتا..

...

شكلنا الهوى مش مكتوب لنا
بياخدنا كتير كده علي عقلنا..

كل سنه و انت حبي

كل سنه و انت حبي
كل حب و انت عيدي..

...

ياللى ساكنه العمر فيا
و هواكى جارى فى وريدى..

...

مش بحبك صدقيني
الكلام ده كان زمان..

...

انهارده انت فى عيني
الحب نفسه ..القلب نفسه
الفرحه و الاحزان كمان..

...

فرحتى انت هى
دمعتى انت هى
ضحكت العمر اللي فات
و الليالى اللي جايه..

...

انت كل الذكريات
انت صوتى و السكات..

مش بقولك لا كفايه
حبك انت مالوش نهايه..

...

كترى حبك فى قلبى
واملى عمرى اهات و زيدى..

...

كل سنه و انت حبى
كل حب و انت عيدى..



هو انا اقدر؟

و هو انا اقدر؟

.ارمي الخوف من جوه عنيكى..

...

.واروي البسمه بشهد مكرر

.يطرح جلبى جناين ليكى..

...

.ده العمر اللي سنين متحير

.اترسمت سكته بأديكى..

...

.مانتيش عارفه يا يامنه

.غلاوتك عندى عامله ازاي..

...

.ما انت لو مصدقه و مأمنه

.تعرفي انك ارضى وسماى..

...

.والخوف اللي باينلى في عينك

.ده خوف مني؟

.وحياة عينك

.عينى تروح ولا انك مره تجولى الاى..

...

.بس مايمنعشى انك عايبه

.اكلتيني بايدك ديه اللقمه الطايبه..

وجايبه بابورك والسخان
وملت الغيط ريحة الدخان
وتتسى تجيبي كبابى الشاى..

...

والله عليكى الضرب جليل
استنى اللى انا هعمله فيكى..

...

ولا اجولك في الحته ادي
راح اطلع عيل
عمر ما جلبى يجي عليكى..

...

هو انا اقدر؟؟
ولا اتخيل؟؟
ارمي الخوف من جوه عنيكى..



يوم العيد

كل الكلام انكتب واتقال

طب اعمل ايه

واجيب منين معنى بس جديد..

...

وفي عنيكى من احلى الكلام شلال

وتكرار الكلام في لغتنا مش بيفيد..

...

فيه ناس تشبه الجمعة في الطيبه

وناس كما الخميس

تشوفها تبقى سعيد..

...

وناس كما التلات بايخه

قلوب شايخه و وش حديد..

...

وناس زيك كما الاحلام

ولو فيه يوم يشبهك ما بين الايام

اكيد اليوم ده يوم العيد..



و بتشعبط

وبتشعبط في الشعاع اللي
واخداه الشمس في غروبها..

...

وتبعت روعي سلام للي
خذت قلبي وتاهت روعي في دروبها..

...

واوشوش مره واهمس مره واعلي
صوتي واتمني لو اتغلغل
مع خيوط الشمس وسوا نغزل
لست الحسن والجمال توبها..

...

واستني شروق الشمس من ثاني
وقلبي يبات يتمني
وعقلي يخاف تنساني..

...

فحلفتك يا شعاع بلغ
سلامي وشوقي للجاني..

...

وهاتلي معاك مع شروق الشمس
مكتوبها..

...

وبتشعبط في الشعاع اللي
واخداه الشمس في غروبها..

يتيمه الروح

يتيمه الروح في بعادك

وبعدك قلب قلبي جريح**

**.

غيطان بالجرح مزروعه

بتطرع قسوه مشروعه**

**.

وفي كوني الفرحة ممنوعة

بأمر صريح**

**.

يا اقسى م الالم نفسه

يا امل القلب ولون يأسه**

**.

يا هادمه مدن الهوى في قلبي

وبانيه لقلبي فيكي ضريح**

**.

انا منك انا ليكى

انا اللي بعمرى افديكى**

**.

انا الدايب غرام فيكى

وعلي اعتابك فوادي جريح**

بذور احلا رميناها
ورسمنا عمرنا معاها**
رعاها القلب ورواها
وفي الاخر طواها الريح**
**

يتيمه الروح في بعادك
وبعدك قلب قلبي جريح**



مانيش مسئول

مانيش مسئول

.عن اللي هيجرا في غيابك
.مانيش مسئول..

...

.وما تسألنيش عن قلبي
.لو مره قسي وسابك
.وقال مشغول..

...

.ولا تنده ولا تبعت
.رسايل شوق مع صحابك
.ولا تخلي عيونك دول..

...

.يشاغلوني
.ولا مره يحايلوني
.وخذ شمسك خارج كوني..

...

.وخذ ضيك بلاش
.في الليالي يمر
.ولا يشاغل كده عيوني..

...

.ولا عشقي وغرامي يغر
.قلبك اللي متعود

يعيش العمر من دوني..
وان كان علي عشق جوايا
مداري وليك متخبي..

...
وان كان علي السهم اللي
رمىته في يوم
وبكل قساوه جرح قلبي..

...
هقول معرفش
مين اللي رماه..

...
وكان قلبي ماشي في حاله
ولا حتي واخذ باله
مين اللي رمى سهمه
وسرق روي كمان وياه..

...
ولو سألوني عن اسمك
هقول ولا شوفته ولا عارفاه..

...
وامضي وكمان ابصم
علي ده القول..

واكيد اكيد هتتقيد
فاعل مجهول..

...
مانيش مسئول
.عن اللي هيجرا في غيابك
مانيش مسئول..



عارفه يا اما

عارفه يا اما

كنت بسأل قلبي عنك
لما هل العيد و لاح..

...

شوفت فيه صورتك كأنك
لا غبتي عنى
و لا عمرى منى راح..

...

شوفت نفسى جوه منك
و انت بر من الامان..

...

و انت نبع من الحنان
و انت ليا بحور سماح..

...

مهما غبتي و الزمن جرح و خان
لسه يا اما انت حزنك
فى فرحتك او حتى حزنك
لسه شايفه اضيق مكان
بس فيه كل البراح..

.عارفه يا اما
.كنت بسأل قلبى عنك
.لما هل العيد و لاح..

...
.عارفه يا اما قالى ايه؟
.بعد منك لسه طير
.بس طير من غير جناح..



دخل عيونك جوانا

بلاش تشوفنا من بره

دخل عيونك

جوانا..

...

وبص شوف كمان مره

تلاقي قلوبنا

فرحانه..

...

صحيح ملناش

نصيب في كثير..

...

لكن الضحكه في قلوبنا

بتغنيانا عن التفكير..

...

ولا بنحسد

ولا بنحقد

ولا بنطمع في رزق الغير..

...

ما دامت الضحكه

في وشوشنا..

...

مفيش شئ يمنع

ولا يحوشنا..

نحمد ربنا انه

زرع
في قلوبنا بذرة خير..

...

ويكفينا
نشوف الفرحة في عيننا ..

...

ويكفينا في عز البرد
نحس احنا

بدفا ايدينا

وما بتفرقش ويانا..

...

بلاش تشوفنا من بره
دخل عيونك جوانا..



تستاهل

تستاهل

ما كنت في حالك
كان ايه خلاك تقرب من بنات حوا..

...

ما دمت في الغرام جاهل
ومجاش يوم علي بالك
ان للبحور نوه..

...

وان الهوي ماهوش ساهل
وطرف توبه لو طالك
هتعيش العمر تتلوي..

...

ما بين السهد في ليل كاحل
وبين الآه في موالك
لاحول ليك ولا قوه..



اتحداك

اتحداك لو تعشق تانى
تبقى صحيح
فى عيونى جدع..

...

الكل يا قلبى غدار و انانى
يا عاش مخدوع
يا اما خدع..

...

اما رهانى معاك مش غالى
حاجه كتيره فى الوقت الحالى..

...

المغلوب فى رهانا يا قلبى
من غير تفكير..

...

راح يشرب غصبا عنه
شوب عصير..

...

مش رمان زى زمان
عصيرنا يا قلبى
طعمه وجع..

...

اتحداك لو تعشق تانى
تبقى صحيح
فى عيونى جدع..

احلم تانى

لما يضيع من ايدك حلمك
و قصاد عينك
كده يتهد..

...

لما تلاقى الدنيا معانده
و مفيش فايده
معاها بجد..

...

احلم تانى
و ابنى امانى
خلى شريط امانيك ممتد..

...

و انت يا دنيا
ضيعى حلم.. اتنين.. ملييييين
انا وياكى لآخر الكون
لما تقولى تعبنى العد..



اطيب قلب قاسى

ليه سم عسلك يملئ كاسى..؟؟
يا ام اطيب قلب قاسى..

..
ابعدينى..قربينى..
ودعيني ..
و ارجعنى حنى لسنينى..

...
بس او عى مره تنسى
الى كان بينك و بينى..

..
و اعرفى
انى ببعد غصب عنى..

..
و انى لما بودعك
قلبي بيبيكى
و انت فاكرانى بغنى..

..
هاتى قلبك اللى
صورتى
ساكنه فيه..

و دورى من غير قساوه
هتلاقيه..
حب بجنون
و عشق عيون ست البنات..
..
غرقان
و بحرك دوامات..
..
و فجأه لقيته من سكات
كاره المراسى..
..
ليه سم عسلك يملى كاسى..
يا ام اطيب قلب قاسى..



امتحان

كل انسان وله امتحان
وبينتهي لو الجرس دق..

...
فيه ناس بلوتها في الباطل
وناس بلوتها كونها مع الحق..

...
تشوف احوال البشر تحتار
ودايما بيكون للقدر اسرار..

...
لا غني قارون نجاه من النار
ولا يوسف للسجن كان يستحق..



حد شاری..؟

حد شاری؟؟

قلب فاضي غصب عنه

لسه ملكی

و عقده ساری..

...

حد شاری؟؟

صفحه بیضا

لا اترسم حد فیها

ولا الغرام علم علیها

غایتہ بس الوهم صابہ

و غصب عنه ماکنش داری..

...

حد شاری؟؟

بحر ملیان بالهموم

ارض صفرا

فی کل خطوه الف حفره

سما خالیه من النجوم

اللی هاجرت کلها

خارج مداری..

...

حد شاری؟؟

واللی ناوی یقول انا

هكتبله عقد ب ١٠٠ سنه
واحكيه عنه وعن قسوته
وايه حياه ومين بأيده موته
وايه اللي خلاه انحي
ومش هداري..
...
حد شاري؟؟..



انكسرنا

بغمض عنيه وبقلبي بشوفك
مادام البعاد مكتوبنا وقدرنا..

...

وامد في اديا بتبعد كفوفك
وليلك يداري نجومنا وقمرنا..

...

اشواقنا تاهت في خوفي وخوفك
وصارت حطب يشعل في نارنا..

...

تعالى نطايطي لظروفي وظروفك
وبعلو صوتنا نقول انكسرنا..



عملت شاعر

عملت شاعر

وما اعرفش ان الشعر له بحور..

...

وانه طريق واعر

مش بس ورد

لأ ده شوك كمان مبدور..

...

عملت عاشق

والعشق داء ودوا..

...

حلو يا طعم الغرام

مر يا جرح الهوى..

...

والخاتمه كانت عتمه

وكنت فاكرها نور..

...

عملت حداد

لجل الحديد ما يلين..

...

لان الحديد والقلوب

لسه يا ناس قاسيين..

لا يفيد معاهم شوق

ولا يردهمش حنين..
ساكنين في قلب القلب لكن
مابينهم وبين العين
عملوا م الغياب ميت سور..

...

عملت درويش
وطوفت في البلاد مشتاق..

...

انده علي اللي هجر
وادعي عليك يا فراق..

...

اسرني اللي هويته
وباعني في الاسواق..

...

عليل وكان الداء
عشقي لاجمل بنات الحور..

...

عملت صياد
والبحر كان عالي..

...

ولما موجه غدر
ضيعلي راس مالي..

...

راح اللي كان في يميني واتبقى
القلب وجع في شمالي..

ورجعت بالشبك خالي
وكمان الشراع مكسور..

...

عملت شاعر
وما اعرفش ان الشعر له بحور..

...

وانه طريق واعر
مش بس ورد لا
شوئك كمان مبدور..



هنتقابل

هنتقابل

و مهما الدنيا
تدور بيكى او بيا..

..

و مهما الزمن ضيع
ملاحم البحر فى عنيا..

..

هتفضل عيونى بحر
و صورتك وشم ع الميه..

..

و تفضل عيونك سحر
و صوتك عندى اغنيه..

..

هغنيها و اعيش فيها
و يوم احلم و اطير بيها
و يوم تانى تطير بيا..
و نتقابل..

..

..

هنتقابل فى يوم صدفه
و لو فى حلم او فكره..

..

و تشتاقى اعود ليكى بأشواقى
او الماضى يعود بكره..

و لما اديكى تتمد
هتلقى بعدنا سد
هتجرى و تحضنى الذكرى..

..
و تتمنى اعود ليكى
و تبقى وحي اشعارى..

..
و تتمنى اغنيكى
و تحضن وحدتك دارى..

..
و تتمنى يعود صوتك
ملك
ملك مملكته اوتارى
و نتقابل..

..
..
هنتقابل
و اتحداكى لو قلبك
فى يوم راح ينسى ايامى..

..
و اتحدى العيون اللى
كانت قدرى و نور بدرى
و الهامى..

و اتحداكى لو تتسينى او انساكى

.او قلبك يميل تانى..

..

و اتحداكى لو تتسينى او انساكى
.او قلبك يميل تانى..

..

و اتحداكى لو تلقى فى يوم غيرى
.بنفس شوقى يلقاكى..

..

هنتقابل برغم عنادك
.و حتى يا عمرى فى بعادك
هنتقابل
هنتقابل فى احلامى



((الفهرس))

رقم الصفحة	العنوان	م
١	المقدمة	١
٣	أنا شاعر	٢
٥	قلبك لقيط	٣
٧	وانت مغمضه	٤
٨	أكبر وهم	٥
١٢	الهوى مبقاش طريقنا	٦
١٥	بعد هواكى	٧
٢٣	انت ايه؟	٨
٢٤	تقدرى؟	٩
٢٦	خلاص ماشيه؟	١٠
٢٩	كنت بحسب	١١
٣٠	ألف وش	١٢
٣٢	احلى حب	١٣

رقم الصفحة	العنوان	م
٣٤	مسافره وحدك	١٤
٣٥	هو مات؟	١٥
٣٧	ستاير خوف	١٦
٣٩	كاتب كرهتك	١٧
٤٢	قلبك غبى	١٨
٤٤	الله عليه الزعل	١٩
٤٥	زى مين؟	٢٠
٤٩	عيونك مجرمه	٢١
٥٠	عينى يا حب	٢٢
٥٣	كلمة الاعجاب	٢٣
٥٤	الهوى مش مكتوبلنا	٢٤
٥٥	كل سنه و انت حبى	٢٥
٥٧	هو انا اقدر؟	٢٦
٥٩	يوم العيد	٢٧
٦٠	و بتشعبط	٢٨
٦١	يتيمه الروح	٢٩

رقم الصفحة	العنوان	م
٦٣	مانيش مسئول	٣٠
٦٦	عارفه يا اما	٣١
٦٨	دخل عيونك جوانا	٣٢
٧٠	تستاهل	٣٣
٧١	اتحداك	٣٤
٧٢	احلم تانى	٣٥
٧٣	اطيب قلب قاسى	٣٦
٧٥	امتحان	٣٧
٧٦	حد شارى؟	٣٨
٧٨	انكسرنا	٣٩
٧٩	عملت شاعر	٤١
٨٢	هنتقابل	٤٢

